



Universitätsbibliothek Paderborn

Ioannis S. R. E. Cardinalis Bona Opera Omnia

Tribus Tomis comprehensa

Opuscula Spiritualia - I. Horologium Asceticum. II. Principia Vitae Christianae. III. Manuductio ad Coelum. IV. Via Compendii ad Deum. V. De Sacrificio Missae. VI. De Discretionem Spirituum ... Operum Eminentiss. Cardinalis, Tom. I

Bona, Giovanni

Parisiis, 1677

Cap. 19. Diarium & Sylvula aspirationum pro omni actione diei, & pro qualibet occasione

urn:nbn:de:hbz:466:1-9969

testantur, & predicatione perpetua majestatem sui loquuntur auctoris. Magnus est liber creaturarum, in quo non solum vir incomparabilis Antonius Abbas, ut de eo Athanasius (l) refert, sed etiam mundi sapientes studuerunt. Trismegistus dixit mundum esse librum Divinitatis, & speculum divinorum, in quo Deus seipsum clarè expressit. Orpheus in hymnis mundum esse ait musicam admirabilem, quæ prædicat, & laudat Deum: quod etiam noster hymnographus cecinit dicens; (m) *Cæli enarrant gloriam Dei.* Sunt Creaturæ nutus, quibus Deus se nobis manifestat, ex sententia Augustini, (n) & Gregorii Papæ: (o) Sunt venæ divini susurri, ut idem Gregorius (p) testatur. Sunt choreæ, quas mater natura Numini statuit, ut canit Synesius. [q] Sunt fontes divini amoris, ut docet Angelicus Doctor. [r] Nulli ergo dubium, quin facillimè possit, quicumque huic studio animum applicaverit, ex aspectu cujuslibet creaturæ in Deum assurgere, & piis affectibus ad Creatorem aspirare. Præxim hujus exercitii mox tradam, si prius monuero fuisse quemdam virum sanctum, qui omnia quæcumque audiebat, & videbat, ad Christi passionem referebat. Si clamor occurreret, aut tumultus, vel ictus malleorum: Si scalas aspiceret, aut ligna, aut lanceas, aut clavos, aut aliud quidpiam, ex omnibus occasionem captabat Christi passionem grato animo recolendi. Poterit autem hujusmodi exercitatio ad totam Domini vitam extendi, adhibitis Aspirationibus, quæ superiori capite descriptæ sunt.

CAP. XIX. *Diarium, & Syloula Aspirationum pro omni actione diei, & pro qualibet occasione.*

EX uberrima messe spicilegium faciam, cuncta enim percurrere ex quibus elici Aspirationes possunt immensi voluminis foret; sed sicut scriptum est: [a] *Da*

l In vita S. Antonii. m Psalm. 18. 1. n Lib: 2. de lib. arbit. c. 17. o Moral. lib. 26. c. 8. p Ibid. lib. 5. c. 20. q Hymno. 3. r Opusculo 61. & Prov. 9. 9.

occasionem sapienti, & addetur ei sapientia. Primò autem præcipuas diei actiones, & exercitia proponam; tum pleraque alia, quæ frequentius occurrere solent, ut in quolibet actu, & occasione piorum affectuum sylva semper in promptu habeatur.

Cùm quis noctu expergiscitur.

1. **D**eus propitius esto mihi peccatori: educ me de tenebris & umbra mortis, & dic de tenebris lucem splendescere.
2. Voca me, Domine, in admirabile lumen tuum; & illumina tenebras meas, tu lux filiorum lucis, tu dies qui nescis occasum.
3. Tuere me, Domine, ne tenebricosa peccati caligine involvar: eripe me ab omni inquinamento carnis & spiritus.
4. Fiat mihi nox ista illuminatio mea in delitiis meis, quoniam memor fui nocte nominis tui Domine.
5. In lectulo meo quasiivi per noctem quem diligit anima mea. Doce me, Domine quærere te, & ostende te quærenti.
6. Anima mea desideravit te in nocte, sed spiritu meo in præcordiis meis; de mane vigilabo ad te, splendor paternæ gloriæ.
7. Nox est, & alta rerum quies, ac profundum silentium. Amemus Deum nostrum; anima: nam amor secretum optat.
8. Ardeant tibi & luceant, Deus meus, sidera tua, & tot accende rædas amoris in corde meo, quot in cælo splendent stellæ.
9. O si animus ad amoris lucernam vigil hæreret, dum somnum corpus capit, itaut dicere possem cum sponsa, Ego dormio, & cor meum vigilat! Da mihi, Domine, cum necessaria somni quiete perpetuam amoris vigilantiam.
10. Gratias ago tibi, Deus meus, quia dum nox in suo

cursum medium iter haberet, omnipotens sermo tuus è regalibus sedibus venit, ut eos illuminaret, qui sedebant in tenebris, & umbra mortis.

Mane cum surgis.

1. **B**enedicta sit sancta Trinitas, atque indivisa Unitas, Pater, & Filius, & Spiritus Sanctus, confitebimur ei, quia fecit nobiscum misericordiam suam.

2. In nomine Domini nostri Jesu Christi crucifixi surgo; ipse, qui me redemit, me custodiat, protegat, atque defendat ab omni malo hodie, semper, & in hora mortis meæ.

3. Credo tibi, Domine mi, in te spero, ac toto corde te diligo: ex te enim, & in te, ac pro te sunt omnia, Deus meus, & omnia.

4. Deus, Deus meus, ad te de luce vigilo: Sitivit in te anima mea, quam multipliciter tibi caro mea.

5. Pater sancte, in unione amoris dilectissimi Filii tui commendo tibi hodie spiritum meum.

6. Offero tibi cor meum, & oro te, ut omnis cogitatio, locutio, & operatio, ac voluntas mea secundum beneplacitum tuum hodie dirigatur.

7. Laudo, glorifico, & saluto cor tuum, dulcissime Jesu Christe, gratias agens pro fidei custodia, qua me hac nocte protexisti: & quia laudes pro me, & gratiarum actiones, atque omnia, quæ ego debeo Deo Patri incessanter persolvis.

8. Commendo, Domine, divinæ sapientiæ tuæ visum meum interiore, & exteriori, ut lumen cognitionis mihi largiaris, quo voluntatem tuam agnoscere valeam, visumque cohibeam ab omni vano & illicito objecto.

9. Commendo auditum meum misericordiæ tuæ, ut ab auditione mala me protegas, & intellectum tribuas ad omnia, quæ hodie auditurus sum.

10. Commendo benignitati tuæ os meum & vocem, ut gustum divini spiritus infundas mihi, & ab omni lapsu linguæ me custodias.

11. Commendo pietati tuæ manus meas : ut opera mea tuis apponas operibus , & in eis omnia mea sanctifices , & perficias , & ab omni pravo opere me retrahas.

12. Commendo cor meum divino amori tuo , ut illud cordi tuo unias , tuoque amore ita succendas , ut nunquam deinceps de re aliqua terrena delectetur.

Dum indueris.

1. **E**Xue me, Domine, veterem hominem cum actibus suis, & indue me novum hominem, qui secundum Deum creatus est in justitia, & sanctitate veritatis.

2. Indue, Domine, animam meam cyclade auro texta, vesteque nuptiali charitatis, quæ operiat multitudinem peccatorum meorum; & immensis monilibus virtutum exorna me.

3. Largire quæso animæ meæ vestes & ornamenta, quæ eam maximè deceant, ne deformitas mea appareat coram te, & Sanctis Angelis tuis.

4. Præcinge lumbos meos, purissime Jesu, cingulo castitatis & pudiciæ, ut viam mandatorum tuorum expeditè currere possim.

5. Fac, pie Domine, mecum quod solent mundi proceres; vestes patientiæ & humilitatis, quæ tibi regnanti in gloria non sunt amplius necessariae, largire mihi pauperculo servo tuo, qui eis maximè indigeo.

6. Te sic præcipiente, Deus meus, corpus terrenum terrenis vestibus induo: non propter ornatum & superbiam; sed propter necessarium operimentum, & ut ex habitu status meus discernatur.

7. Dum ego corpori suas vestes tribuo, tu Deus indue animam veste innocentiae, ut habitus ejus laudabilis appareat coram te.

Cum manus abluis.

1. **D**A virtutem, Domine, manibus meis ad abster-
gendam omnem maculam, ut sine pollutione men-
tis & corporis valeam tibi servire.
2. Amplius lava me, Domine, ab iniquitate mea, &
à peccato meo munda me.
3. Domine Jesu, qui lavisti nos à peccatis nostris in
fangvine tuo, lava omnes animæ meæ sordes, & super
nivem dealbabor.

In ortu Solis.

1. **E**Xorere, exorere Sol justitiæ, & illustra splendo-
ribus tuis animam meam.
2. Emitte lucem tuam, & veritatem tuam: ipsa me
deduxerunt, & adduxerunt in montem sanctum tuum,
& in tabernacula tua.
3. O lux, quæ illuminas omnia, absorbe me in chari-
tatis abyssum, ut videam semper te in te, & me in te,
& cuncta sub te: nam sine te omnia mihi sunt tenebræ,
& nox obscura.
4. O sol animæ meæ, Deus meus, quam amabilis est
pulchritudo tua! Amo te lumen æternum, & ardentius
amare desidero.

Ante Divinum Officium.

1. **V**Ocabis me, Domine, & ego respondebo tibi,
operi manuum tuarum porriges dexteram.
2. Domine in unione illius intentionis, qua ipse in
terris laudes Deo Patri persolvisti, hoc tibi officium per-
solvere intendo.
3. Benedic anima mea Domino, & omnia quæ intra
me sunt, nomini sancto ejus.
4. Ergone ranuncula vilis de cœno iniquitatum egressa
coram Domino majestatis perstrepere audebo? Et quis
sum ego pulvis & cinis, ut loquar ad Dominum meum?

C. Bona Opusc. Spirit.

Ll

5. Introibo in domum tuam, adorabo ad templum sanctum tuum, & confitebor nomini tuo. In conspectu Angelorum psallam tibi.

6. Confiteantur tibi, Domine, omnia opera tua, & Sancti tui benedicant tibi. Psallite Domino Sancti ejus, & confitemini memoriæ sanctitatis ejus.

7. Summè desidero laudare te, Domine Deus meus, & sic honorem afferre tibi, quoniam tu dixisti, Sacrificium laudis honorificabit me.

8. Accipe laudationem meam, Domine, vitulos labiorum meorum, & quia vir pollutus labiis ego sum, sanctifica me, & mitte Angelum tuum, qui calculo ignito emundet os meum, & faciat me dignum laudibus tuis.

9. Illumina intellectum meum, Domine, ut corde percipiam quod ore pronuncio: transforma in te sensus & cogitationes meas, vt nihil præter te cogitem: affectus purifica, & voluntatem inflamma, ut te solum amem, & desiderem.

10. Te laudare volo bone Jesu; tu supple pro me, quicquid minus est in me.

Post Officium.

1. **G**Ratias tibi ago, Domine Deus, quod meas indignas orationes audire dignatus sis, & de manu mea laudum tuarum sacrificium suscipere.

2. Unde mihi hoc, ut invenirem gratiam ante oculos tuos, Domine mi, qui consolatus es me, & fiduciam præbuiisti orandi te?

3. Dimitte, Domine, secundum magnitudinem misericordiæ tuæ quicquid in tuo servitio scienter, vel ignoranter peccavi; & admitti jubeas ante conspectum majestatis tuæ deprecationem servi tui.

4. Recordare fragilitatis meæ, & ignoscens distractionibus meis, miserere mei Deus, & omnium, pro quibus oravi.

5. Suscipe, benignissime Jesu, obsequium servitutis meæ in piissimum cor tuum, & illud tuis, atque Sanctorum precibus adjungens purifica, supple, perfice, & offer Deo Patri ad tuam, & Sanctorum gloriam, ad meam, & omnium salutem.

Ante Missam, vel Communionem.

1. **D**omine Jesu, in memoriam tuæ passionis & mortis offero tibi hujus Missæ, & omnium Missarum, quæ in toto mundo celebrantur, hostiam immaculatam sacrosancti corporis, & sanguinis tui.

2. Suscipe me, Domine, cum oblatione hujus hostiæ immaculatæ in laudem gloriam, & beneplacitum tuum in unione illius oblationis, qua temetipsum in ara crucis obtulisti.

3. Memoriam fecisti mirabilium tuorum, dulcissime Deus animæ meæ, & in escam unam omnes amoris vires contraxisti. Utinam hic cibus me transformet in te, & lapideum pectus meum igne tui amoris accendat, & disrumpat.

4. Veni, Domine, & noli tardare; reple bonis tuis esurientem animam meam, & calice suavitate tuæ inebria sitientem.

5. Melior est panis tuus, quàm omnes delitiæ mundi, quas ideo respuo & abominor: & calix tuus inebrians quàm præclarus est!

6. Panis dulcissime sana palatum cordis mei, ut sentiam suavitatem amoris tui. Sana me ab omni languore, ut nullam præter te amem pulchritudinem.

7. Ignis qui semper lucet, amor qui semper ardes, illumina & accende me, ut citra condemnationem assistam metaendo altari tuo.

8. Ne projicias me à facie tua cum divinissimis donis tuis venientem ad te: neque me adverseris propter nimiam indignitatem meam.

9. Quemadmodum desiderat cervus ad fontes aquarum.

rum, ita desiderat anima mea ad te Domine Jesu, Saluator meus.

10. Manna suavissimum, omnem habens saporis suavitatem pro cuiusque desiderio, recrea hodie, ac suaviter affice aridum palatum animæ meæ.

11. Veni, obsecro, æterna sapientia, tam potenter hodie in animam meam, ut cunctos profliges hostes meos, cuncta vitia consumas, cuncta peccata remittas.

12. Ignem venisti mittere in terram, benignissime Jesu, accende illum in me, & eventila gratiâ tuâ, ut semper crescat.

Ad elevationem Hostiæ & Calicis.

1. **P**rotector noster aspice Deus, & respice in faciem Christi tui.

2. Amo te, & adoro toto corde & affectu. Lava me in tuo sanguine, & da mihi pati pro amore tuo.

3. Tu Rex gloriæ Christe: tu Patris sempiternus es Filius.

4. Amantissime Jesu, per effusionem sanguinis tui fac ut mundo mortuus tibi soli vivam, à meipso penitus deficiens.

Post Missam, vel Communionem.

1. **G**ratias ago tibi, Domine Jesu, quia me vilissimum peccatorem admittere dignatus es ad vivificum tuæ mensæ convivium. Ignosce vilitati meæ, & fac me hominem secundum cor tuum.

2. Saucia, Domine, cor meum vulneribus tuis, mentem meam inebria sanguine tuo, ut quocumque me veram semper te videam crucifixum, & quicquid aspexero tuo sanguine tinctum appareat mihi.

3. Sanctifica, Domine, animam meam, & benedictionem tuam in ea relinque. Ingredere cubiculum cor dei mei, & illud posside in sempiternum.

4. Respice in me, Pater æterne, quia Unigenitus

Filius tuus intra viscera mea clamat ad te.

5. Penetrét amor tuus, clementissime Jesu, intima mea, & omnem alium amorem expellat.

6. Transforma me totum in te, ut omnis substantia mea pereat in te, nec me ampliùs inveniam nisi in te.

7. Recedo modicum à te, sed non sine te, Domine mi, consolatio mea, & omne bonum meum. Da mihi vivere semper in te, & tibi jugiter adhærere.

Ante mensam, & dum reficeris.

1. **D**A mihi, Domine, operari non cibum qui perit, sed qui permanet in vitam æternam.

2. Ecce, Domine, ad mensam accedo, da mihi congruam servare moderationem, ne ex indiscreta parsimonia deficiat corpus; aut ex nimietate gravetur & infollescat.

3. O quanti pauperes fame pereunt! mihi autem nihil deest. Gratias ago tibi Deus, qui pascis me à juventute mea, & usque nunc.

4. Quàm suavis es, Domine, animæ quærenti te! Utinam nihil sapiat, nihil dulcescat mihi, nisi tu. Tu cibus meus, tu potus suavissimus, tu omnis delectatio mea.

5. O si deterior ferculorum pars mihi semper contingeret, sicut decet me! Indignus enim sum rationalis creaturæ cibus, & pane filiorum, quia jumentis insipientibus similis factus sum propter innumerabilia & execranda peccata mea.

6. Fac me semper, Domine, esurire & sitire justitiam. Sitivit anima mea ad Deum fontem vivum, quoniam apud te est fons vitæ.

7. Quàm dulcia faucibus meis eloquia tua! super mel ori meo.

8. Dederunt in escam meam fel, & in siti mea potaverunt me acero.

9. Præsta mihi, Domine, ut sicut corpus terreno ci-

bo, ita cœlesti alimonia mentem reficiam,

Post mensam.

1. **G**Loria tibi Domine, qui me cibo ac potu necessario refecisti: fac me semper abundare in omni opere bono.

2. Singulas buccellas, & guttas quas sumpsi offero tibi in laudem æternam; in unione illius amoris, quo tu Deus meus pro me factus homo cibum & potum sumpisti in terris ad honorem Patris tui.

3. Parce mihi, Domine, quia temperantiæ limites transgressus sum: da ut deinceps omnem concupiscentiam superem, & omnia gulæ irritamenta.

Ante quodlibet opus.

1. **D**omine Jesu, da ut peragam opus istud ad gloriam tuam, & salutem meam, sicut tibi placitum est.

2. Da mihi sedium tuarum assistricem sapientiam, ut mecum sit, mecum laboret, ut sciam quid acceptum sit coram te omni tempore.

3. Da mihi, Domine, spiritum discretionis, ut vera à falsis discernere queam; ut sciam eligere bonum, & reprobare malum.

4. Fac ut optimum finem semper intendam, & omnia prævideam quæ accidere mihi possunt.

5. Adjuva, dirige, & conforta me, ut secundum te, tecum, & propter te hoc opus perficiam, quia sine te nihil sum, nihil possum.

Opere peracto.

1. **D**omine Jesu hoc opus, quod peregi commendo mellifluo cordi tuo emendandum ac perficiendum: tibi que illud offero in unione operum tuorum.

2. Domine, si quid unquam tibi gratum feci ex gratia tua, id omne approbo & ratifico, id renovo & confirmo.

3. Quicquid neglexi offerre tibi ex actionibus meis, id hoc momento quantum possum compenso, & tibi omnia propter te offero omnium Angelorum, & Sanctorum affectu.

Cum è domo, vel cella egre deris.

1. **V**ias tuas, Domine, demonstra mihi, & semitas tuas edoce me. Perfice gressus meos in semitis tuis, ut non moveantur vestigia mea.

2. O quanti sunt infirmi & claudi, quibus ambulare concessum non est! Gratias tibi ago, Domine, quia corpus integrum dedisti mihi, & me hactenus incolumem conservasti.

3. Sequar te, Domine, quocumque ieris, quia verba vitæ æternæ tu habes.

Cum regrederis.

1. **A**perite mihi portas justitiæ, & ingressus in eas confitebor Domino. Hæc porta Domini, iusti intrabunt in eam.

2. Hæc requies mea in seculum seculi, hîc habitabo, quoniam elegi eam.

3. Elegi abjectus esse in domo Dei mei, magis quam habitare in tabernaculis peccatorum.

Ad sonitum Horologii.

1. **B**enedicta sit illa hora, qua Dominus noster Jesus Christus incarnari voluit & pati pro nobis.

2. Respice in me, Domine, & miserere mei præsertim in hora mortis meæ: & fac me talem in hac hora, qualem me desideras in æternitate.

3. O Deus infinitè amabilis, quam parum hæctenus dilexi te! Dixi, nunc cœpi. Da quod jubes, & jube quod vis.

4. Quàm pœnitet me temporis, cujus inutiliter jacturam feci! Utinam illud possem revocare, ut in rebus tibi placitis totum infunderem.

Ll iij

5. Ecce lapsa est hora, Deus meus, & nullum in me sentio amoris incrementum. Utinam geminatis ignibus hanc jacturam resarciam.

6. Quanta est misericordia tua, Domine, quia me usque ad hanc horam tolerasti! Gratias ago, & doleo, quod tam ingratus fuerim.

7. Offero tibi, æterne Pater, quicquid dixero, fecero, cogitavero hac hora. Utinam eam utiliter transigam ad majorem tui gloriam.

In dolore & quacumque tribulatione.

1. **F** Asciculus myrrhæ dilectus meus mihi, inter ubera mea commorabitur. Auge, Domine, dolores, auge afflictiones; sed auge etiam patientiam. Hic ure, hic seca, ut in æternum parcas.

2. Recordare, Domine, fragilitatis meæ, & dic Angelo percutienti, Cesset jam in manus tua. Veruntamen non mea, sed tua voluntas fiat.

3. Tu es refugium meum, Jesu crucifixe, in tribulatione quæ circumdedit me: exultatio mea, erue me à circumdantibus me.

4. Si vis, Domine, omnia mala pœnæ libenter patiar pro te, sine ulla consolatione. Omnia volo, nihil volo.

5. Bonum mihi, Domine, quia humiliasti me. Propter te sustinui opprobrium, operuit confusio faciem meam.

6. Gratias ago tibi Deus, quia voluntas tua in me adimpletur, qua voluisti ab æterno, ut hæc mihi evenirent. Offero ea tibi ad gloriam tuam, in unione passionis Christi.

7. Tuus sum ego, Domine, tu scis quid mihi expediat. Offero me tibi in omne beneplacitum tuum.

8. Gratias tibi ago, quia nos etiam invitos rectè fingis, & per externum hominem internum purgas.

9. O Amor, ea intentione, qua pœnam istam de corde Dei mihi attulisti, tibi committo; ut eam in summa gratitudine ibidem reconsignes.

10. Tibi, Domine, hæc omnia patior. Sit nomen tuum benedictum in secula, qui voluisti hanc tribulationem venire super me. Sicut placuit tibi, ita factum est.

In prospero successu.

1. **N**on nobis Domine, non nobis; sed nomini tuo da gloriam. Fallax est honor mundi, fallaces hujus vitæ consolationes: Satiabor cum apparuerit gloria tua.

2. Valdè quidem me consolatur res ista, Domine Jesu; eam tamen nolo nisi à te, in te, & propter te, paratus ea carere, quoties volueris.

3. Nolo, Domine, hîc consolari & felix esse; sed afflige me in præsentî, ut misericordiam in fine consequi valeam.

4. Benedictus es, Domine, qui adjuvisti me, & consolatus es me; cum mihi minimo, & infelici nulla debeatur consolatio, nulla prosperitas.

5. Refulge cordi meo, veritas summa, ut mihi ipsi vilescam, ac omni humana consolatione me indignum existimem.

In omni tentatione.

1. **S**alvator mundi salva nos, qui per crucem & sanguinem tuum redemisti nos, auxiliare nobis, te deprecamur Deus noster,

2. Confige timore tuo carnes meas, à judiciis enim tuis timui.

3. Tu Domine, qui ad exercitium facis ut sentiam, adjuva me, ne consentiam.

4. Excita Domine potentiam tuam & veni, & exurge in adjutorium mihi.

5. Da mihi, Domine, patientiam & pacem, ne perdam coronam in cælo. Tu enim dixisti: In patientia vestra possidebitis animas vestras.

6. Inclina cor meum in testimonia tua, & esto mihi turris fortitudinis à facie inimici.

7. Tu scis, Domine, quàm libenter puram animam tibi exhiberem: sed quia immundum vas habeo, plenum tentationibus; ipsum tibi offero quale est. Munda illud sanctissimo sanguine tuo, ut divini influxus capax efficiatur, tibi que in gratia acceptum fiat.

Cùm te allici sentis ad complacentiam ex pulchritudine, vel alia perfectione creaturarum.

1. **E**cce isti sunt rivuli, Domine Deus meus, qui ex te vero & increato fonte omnium bonorum dimanant: hæ sunt guttæ inexhausti maris tuæ ineffabilis bonitatis.

2. Averte oculos meos, ne videant vanitatem, ne per fenestras oculorum intret mors in animam meam.

3. Resisto, Domine, seductionibus oculorum, ne implicentur pedes mei, quibus ingredior viam tuam: & erigo ad te invisibiles oculos, ut evellas de laqueo pedes meos.

4. Multa fecisti tu Domine Deus meus mirabilia tua, sed tu omnium pulcherrimus & perfectissimus es. Quando veniet dies, ut in te solo delecter?

5. Quàm callidè hic lates absconditus, maledicte serpens, ut me tuo veneno inficias! Benedicta sit bonitas Dei in æternum, qui mihi hostem hic latentem, & anime meæ dolosè insidiantem tam benignè detexit.

In transitu ante Ecclesiam, & in ejus ingressu.

1. **E**Rgone putandum est, quòd verè Deus habitet super terram? Si cælum & cæli cælorum te capere non possunt, quantò minus hæc domus?

2. Tu Domine, qui pollicitus es, Ecce ego vobiscum sum omnibus diebus usque ad consummationem seculi, exaudi orationem fervorum tuorum orantium in templo isto.

3. Domine in multitudine misericordiæ tuæ introibo in domum tuam, adorabo ad templum sanctum tuum, & confitebor nomini tuo.

4. Omnes Sancti & Sanctæ Dei, quorum reliquiæ, & imagines hîc sunt, saluto & veneror vos, intercedite pro me.

5. Salvete Christi fideles animæ, quæ hîc & ubique requiescitis; requiem æternam vobis donet, qui pro vobis passus est.

Ante Crucifixum.

1. **D**omine Jesu Christe per illam amaritudinem, quam sustinuisti propter me in cruce, maximè in illa hora, quando anima tua egressa est de corpore tuo, miserere animæ meæ in egressu suo.

2. Suscipe me, Domine, in ulnas tuas, quas in cruce expandisti, protege me ab hoste maligno, & fac me participem crucis tuæ.

3. Adoramus te Christe, & benedicimus tibi, quia per crucem tuam redemisti mundum.

Cùm aridus es.

Pater cœlestis pro frigida & misera cordis mei ariditate offero tibi fervida desideria, & ardentissimum amorem dilectissimi filii tui, beatæ Virginis, & omnium electorum tuorum.

Cùm loquendum est.

Jesu fili Dei, qui coram Judice tacuisti, tene linguam meam, donec cogitem qualiter & quid loquar. Pone, Domine custodiam ori meo, & ostium circumstantiæ labiis meis.

Ante studium.

Domine Jesu, æterna sapientia, purga animam meam igne amoris tui, illumina intellectum, memoriam confirma, ut bonas literas discam, quibus te unum sapiam & diligam; quia extra te quisquis sapit, desipit.

Cum audis Confessiones.

AD singulos pœnitentes hac oratiuncula uti poteris.
Sana, Domine, per me hanc animam in omne peccatum lapsuram sine te. En pretium sanguinis tui, sponsa tua ab hoste vulnerata. Doce me, ut prudenter cœcam, & ægram ad te adducam, pro tua unius gloria. Angele sancte, adjuva me.

In aspectu horti amœni.

EXorna, dilecte mi, virtutum floribus animam meam, Utinam in me floreat liliū castitatis, humilitatis viola, rosa charitatis.

In aspectu pulchræ domus.

QUàm dilecta tabernacula tua, Domine virtutum! concupiscit, & deficit anima mea in atria Domini. Melior est dies una in atris tuis super millia. Beati qui habitant in domo tua, Domine, in secula seculorum laudabunt te.

Dum grata qualibet, & pulchra vides.

ECce tu pulcher es, dilecte mi, ecce tu pulcher es, fons pulchritudinis, exorna splendore gratiæ animam meam quoniam denigrata est super carbones facies mea, propter multitudinem iniquitatum mearum. Ne finas me donis tuis abuti contra te.

In aspectu rei deformis.

FActi sunt abominabiles, sicut ea quæ dilexerunt: tolle à me Domine peccati deformitatem.

Cum pluit.

IRriga, Domine, arentem animam meam, ut fructum boni operis reddat temporibus suis.

Cùm sudum est.

Dissipa, Domine, à corde meo nubeculas terrenorum affectuum, & lucis tuæ radiis illustra animam meam. Refulge super me sol justitiæ, & splendoribus Sanctorum illumina cor meum.

Cùm oculis occurrunt vana.

Quid mihi est in cœlo, & à te quid volui super terram? Averte oculos meos, ne videant vanitatem in via tua vivifica me,

Cùm vaniloquia auribus insonant.

Narraverunt mihi iniqui fabulationes, sed non ut lex tua.

Cùm occurrit peccandi occasio.

Qui elongant se à te, Domine, peribunt: perdidisti omnes, qui fornicantur abs te. Mihi autem adherere Deo bonum est, ponere in Domino Deo spem meam.

Ad nomen, Iesus.

Utinam potestatem haberem cœlum & terram, & infernum cum omni creatura tibi dulcissimo, & fidelissimo amatori inclinandi, ac subjiciendi.

In aspectu arborum.

Laudate Dominum ligna fructifera. & omnes cedri. Ah bone Jesu, quàm adhuc imperfectè tibi servio, & tamen plantatus sum secus decursus aquarum gratiæ tuæ! Adjuva me, ut fructum afferam in patientia.

In aspectu volucrum.

Benedicite omnes volucres cœli Domino. Quis dabit mihi pennas sicut columbæ, & volabo, & requies-

cam ? Eleva me , Domine , à terra , ut alis amoris ad te
volem.

In aspectu Bestiarum.

Bestiarum & universa pecora laudate nomen Domini,
Da mihi , Domine , cognoscere dignitatem meam , ne
fiam sicut equus & mulus , quibus non est intellectus.

In aspectu ignis.

Ignem venisti mittere in terram , Deus meus , & suades
mihi , ut emanem à te aurum ignitum : accende tu illum
in me , ut liquefam amore tuo.

In aspectu aquae.

Anima mea sicut terra sine aqua tibi , sitit ad te fon-
tem vivum. Irriga me , & potum da mihi in lacri-
mis in mensura.

In aspectu Caeli.

Omnia domus Dei , quam vilis mihi fuisti ! Pœni-
tet me Domine , da mihi constantiam in servitio tuo.
Caeli Cœlorum laudate Deum. Quando aperiemini mi-
hi , ut inveniam eum , quem diligit anima mea ?

In alia quacumque occasione.

Nihil prorsus homini occurrit , ex quo non possit
varias ad Deum aspirandi occasiones elicere , qui-
cumque studet Christianæ perfectioni. Nam ut supra-
scriptis oratiunculis , & exercitiis alia quædam in exem-
plum adjiciam ; si tibi occurrat aliquis infidelis , orabis pro
illo , & actum fidei elicies. Si cæcus , claudus , vel aliqua
ægritudine affectus ; eorum misereberis , & Deo gratias
ages , qui membra integra tibi , corpusque validum dedit.
Transiens Xenodochia , ora Dominum , ut det omnibus
patientiam , & consolationem. Cùm legis , audis , aut vi-
des aliquid ad laudem Dei pertinens ; gaude multo magis ,

quàm si laudes tuas audires. Cùm videris aliquem peccantem, vel blasphemantem audieris, statim in spiritu contristare, & Deum pro illo precare. Si angit te desiderium placendi hominibus, cogita quod qui hominibus placent Christi servi non sunt; & opus Deo soli placere. Cùm recordaris alicujus peccati, elice actum contritionis. Si musicam, & concentum audis, ora cum Cæcilia ut fiat cor tuum immaculatum, Deoque psalle in cithara cordis, & ad gaudia Angelorum suspira. Si mundi pompam vides, & hominum superbiam, eam detestare, & dic: Vanitas vanitatum, & omnia vanitas. Ex aspectu Judicum, Principum, & Prælatorum, timorem concipe divinæ justitiæ, & ora pro illis, actumque elice obedientiæ. In introitu alicujus oppidi vel civitatis, Angelos & Sanctos tutelares, quorumque imagines & reliquiæ ibi sunt, venerare, & ora pro habitantibus. Ad imaginem quoque Angelorum & Sanctorum actum dulciæ exerce, & opem eorum efflagita. Cùm se offert imago Evangelistarum, vel Doctorum scribentium, ora & dic: *Scribite me sancti Dei in libro afflictorum, quia affligi semper desidero propter Deum: Scribite me cum Sanctis Martyribus: Scribite me in corde Iesu, & in corde Mariae, ut nunquam obliviscantur animæ meæ.* Si apparet arcus cælestis benedic eum qui fecit illum, & ora pro pace. Si terram excoli cernis, considera qua diligentia agrum animæ tuæ colere debes, & roga pro fructibus terræ. Si bene operantes conspicias, congaude, & opta fieri eorum particeps, & ora pro tua & ipsorum perseverantia. Plura suggerent usus & unctio.

Cùm vespere accenduntur lucerna.

1. **T**ua nos, Domine, veritas semper illuminet, & ab omni pravitate defendat.
2. Domine, apud quem nihil est obscurum, nihil tenebrorum, emitte lucem tuam cordibus nostris, ut in via tua ambulantes nihil patiamur erroris.
3. Te lucem veram & lucis auctorem de precor, ut di-

gneris à me tenebras depellere vitiorum, & clarificare me luce virtutum.

4. Veni cœlestis amor, & fulgidissima facie tua discute noctem ignorantiae meae.

5. O amor, decus & lux virtutum omnium, explica pompam radiorum tuorum in domo cordis mei, ut in lumine tuo te videam lumen æternum.

Ante somnum.

I. **F**Ac me, Jesu dulcissime, super pectus tuum requiescere: da mihi trahere anhelitum de mellifluo corde tuo: influat spiritus tuus suavissimus in animam meam, quicam absorbeat, & inseparabiliter sibi uniat.

2. Tu, quæso, mecum maneat, mecumque dormias hac nocte, ut dormiente corpore mens semper ad te vigilet, & te præsentem videat.

3. Deus creator corporis mei & animæ, respice me misericordia tua, ne tenebricosa peccati caligine involvar.

4. Modera somnum meum, Deus meus, quem sumi præcepisti ad corporis alleviationem; pervigiles concede cogitationes, & mentem sobriam, ne me gravis opprimat sopor.

5. Peto, Domine, & desidero, ut singulæ respirationes meae hac nocte laudem & honorem tibi exhibeant.

6. In manus tuas commendo spiritum meum, redemisti me Domine Deus veritatis.

7. Veni, Divine Amor, & tu mihi somnia dispone, ut in tuum amorem tanquam in somnum suum incumbat cor meum, & in te solo requiescam nunc, & in æternum. Amen.

CAP. XX. De Amore Dei. Quid sit Amor. Ejus origo, prerogativa, & proprietates. Amoris Philosophia à quibus discenda. Possesse Deum facilius amari, quam cognosci.

I. **J**Am quod initio pollicitus fueram pro virium tenuitate, ingenii captu executus sum: nunc consentaneum